

Regional News Unit AIR Aizawl
Saturday, July 06, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- Pawl MHIP kum 50-na, Golden Jubilee chu vawiin hian state chhungah uar taka lawm a ni ang.
- PHE Department chuan Aizawl khawpui chhunga tui harsatna sukiang turin thlakhat zet a la duh dawn a ti.
- President Draupadi Murmu chuan nizan khan sipai leh police huaisen lawmman Gallantry Award mi 36 hnenah a hlan
- Labour Party hruaitu Keir Starmer chu UK Prime Minister thar a ni dawn.

<><><>

MHIP DAY

Mizo Hmeichhe Insuihkhawm Pawl MHIP kum 50-na, Golden Jubilee chu vawiin hian state chhungah uar taka lawm a ni dawn a, he ni pual hian MHIP Gen Hq President Pi Ngurmawii Sailo chuan Zoram mipuite chibai a buk a,

MHIP hi Mizo Hmeichhiate tana din a nih angin, kum 50 chhunga mahni hmun leh hun theuha an thil tihte a ropui em em a ni a ti a, Kum tling lo leh Pawngsual tawk te, sawisak hlum te, nau nei ngaihsak an hlawh loh avanga nun chan te, Social media-ah hmeichhiate tihmualphoa an awm tein, an thlavang hauhin sawkarah tanpuina an ngensak a. Chu mai bakah, ni sen sa leh a thim a var pawh thlu lovin, chhuak khawmin, au rualin, kawng zawhin Mizo hmeichhiate tan an bei thin a ni, a ti.

Pi Ngurmawii chuan, Rahbi tleu a, ruihhlo ngai leh sual kawng zawh mekte chu beidawng lo tura fuihin anmahni chhan turin veng tin leh khaw tinah, MHIP te an awm a, an tlan luhna turin an inhawng reng a ni a ti.

MHIP Day hi vawiin hian hmun hrang hrangah lawm a ni dawn a ni.

<><><>

EDUCATION MINISTER

School Education Minister Dr. Vanlalhlana'n Mizorama zirnain hma a sawn theih nana Public Private Partnership (PPP) Mode ruahman chu kalpui theih a la ni lo tih a sawi.

He thu hi Akashvani palaiin a kawmnaah sawiin Minister chuan, PPP Mode kalpui chu thil hmanhmawhthlak a la ni lo, a ti a.

State dangin an kalpui dan zirchian hmasak phawt a ngai tih sawiin Mizoram Education Reforms Committee-in an buaipui mek, a ti a; tun dinhmunah chuan zirna kalpui dan thlak tumna a la awm rih lo tih a sawi.

Dr. Vanlalhlana chuan tun hnaia zirtirtu lak chu dan dik tak hmanga lak a ni a, Casual Teacher pangngai anga lak an ni tih sawiin duhsak bik nei lovin a thiam thiam lak an ni, a ti a. Kalphung tharah chuan Zirtirtute an awmna hmun ngaiah an awm reng thei dawn lova, khawpuia awmte pawhchhuah an ngai dawn a, Aizawla awm te chu district dangah pawh an awm a ngai dawn, a ti.



WATER SCARCITY

PHE Department chuan tui harsatna sukiang turin thlakhat zet a la duh dawn avangin tui renchem leh ruahtui khawl zel turin mipui a ngen.

Thuchhuah tarlan danin Cyclone Remal in May Ni 28 a Aizawl tui lakna hrang hrang a tihchhiat siamtha turin ngawrh taka hmalak mek a ni a, Phase 1, 2 & 3 a Tui pump khawl siam ngaite phaiah khawih mek a ni tiin Phase 2 chu dan pangai a tui pump thei turin siamrem a ni tawh a. Phase-1 chu Tlawng tui a dawtna la tha thei lo mahse Phase-2 atanga pek thlakna tur ruahmanin, Phase-1 pawhin khingbai takin tui a pump chhuak ve leh thei tawh an ti a,

Ruah tam zual laia tui nu lutuk chuan lei nawi leh bawlhhlawh tam tak, pump-in tui a dawtna ah a rawn chhek luh zel thin avangin, heng bawlhhlawh tihfai nan chuan nitin hun engemawzat sen reng a la ngai an ti a, nikhat a tui pump theih hun chung a tam theilo tih sawiin nitin a tui litre mtd 30 vel pump thin khan tun dinhmunah hian Phase 1 & 2 atangin nikhatah tui litre mtd 16 vel chauh a pump chhuak thei tih an sawi.

Thuchhuah tarlan danin Phase 3 (SIPMIU), nitina mtd 10 pump thin chu Electric motor phaia siam a la nih avangin, tun thlengin tui a la pump thei rih lo a, harsatna hrang hrang department in a tawh avangin PHE Department chuan mipuite dawhtheihna leh hriatthiamna an ngen a ti a, Ngai awh leh turin thlakhat zet a la duh dawn avangin tui renchem leh ruahtui lo khawl zel turin mipui a ngen bawk.



CHAMPHAI BBBP

Women & Child Development Department hnuiaia District Hub for Empowerment of Women, District Programme office, buatsaihin Champhai Higher Secondary school ah 100 Days Awareness Campaign cum Mission Shakti leh Beti Bachao Beti Padhao (BBBP) neih a ni.

Mission Shakti leh Beti Bachao Beti Padhao te hi sorkar laipuiin hmeichhia harsatna tawkte tanpui leh an dinmun chawikan a, hmeichhe naupang te humhim leh zirna pek a nih theih nana a ruahman a ni a, 100 days Awareness Campaign under SANKALP-HEW hawna hun a nei a. 100 days Awareness hian a tum ber chu Women Schemes hrang hrang kan neihte tangkai zawka mipuiin kan hman theih dan tur te, ram leilung humhalh a nih theihna tura thingphun uar te, dan leh hrai in hrilh hriatna kawnga zau zawk a hmalak te leh hmeichhiate dikna chanvo hrang hrang inhrilh hriatna hun hman te a ni.

He hunah hian Rodinglana, Specialist in Financial Literacy, K Lalrinfimi, District Co-ordinator leh Vanlalhruaii, Protection officer, DCPU te chuan zirlai kalkhawmte chu an zirtir a ni.

Mission Shakti hnuaiiah hian Mizorama district pariat ah One Stop Centre te siam niin, hmeichhia thlabar leh harsatna tawkte mikhual nan hman a ni thin a. District thar pathum a OSC hi din turin ruahmanna siam mek a ni. Hemi bakah hian hmeichhia leh naupang ten phone hmanga an harsatna te an thlen theihna tur Helpline siam a ni bawk a. OSC leh Helpline ah hian domestic violence avanga a puihna dil an tam ber a ni. Heng bakah hian Shakti Sadan leh hamthatna dangte din a ni bawk.

He hunah hian, dan thar 3- Three New Criminal Laws chungchang zirho a ni a, he dan thar 3 hian tunhma a Court case pending tam lutuk thin tih ziaawm nan a duan a ni a. Pawi khawih tu leh a tuartu tan pawh hamthatna leh hremna khauh zawk tamtak duan thar a ni. Investigation process pawh ti danglam in timeline neia investigation kalpui thar tur tam tak a awm bawk a ni.

<><><>

PRIVATE PLACEMENT AGENCY

Mizo thalai, ram pawna hnathawka tirchhuak thin te zawm tur Dan, The Mizoram Placement Agencies Act 2015, Home Department hnuaiiah kenkawh thin chu Labour, Employment, Skill Development and Entrepreneurship (LESDE) hnuaiiah dah thar a ni.

He thu hi LESDE Minister Pu Lalnghinglova Hmar chuan kan Correspondent hrilhin, Chief Minister Pu Lalduhoma kaihhruai Council of Minister thutkhawm hnunung berah he thu hi an pawm a; a enkawltu inthlakna tur rawtna hi GAD atanga lut a ni, a ti a. Mizo thalai ram pawna hnathawka tirchhuak thin te zawm tur Dan hi a nih dan tur ang taka kenkawh a ni dawn tih sawiin dik taka hmang turin department-in theitawp a chhuah dawn, a ti.

Dubai-a Mizo hmeichhiate harsatna tawh chungchanga Congress thalai hruaitute nen an inkawmnaah Chief Minister Pu Lalduhoma'n April ni 29 khan ram pawna Mizo thalaite thawn chhuak thin Private Placement Agency 27 te chu an licence cancel-sak an ni dawn tih a lo sawi tawh, Minister chuan a ti a. Dan hman mek chu a rang thei ang bera siam that a ngai tih sawiin ram pawna hna thawk tur thawn chhuak tur chuan Immigration Act, 1983 hnuaiiah Protector of Immigrant hnuaiiah license an dil tur a ni, a ti a. Hei hi Ministry of Overseas India Affairs hnuaiiah awm niin hemi hnuaiiah license nei thlap te chuan harsatna an tawh ngai lo tih a sawi.

<><><>

SAMPOORNATA ABHIYAN

District chhunga hnufual te mu tan thlanchhuah thenkhatte thla 3 chhung thlur bing turin sorkar laipui chuan Sampoornata Abhiyan chu nimin khan Lunglei ah hawn a ni a,

He hun hman puitu Bawrhsap Pi Ramdinliani chuan Sorkar laipui hnuaiah Niti Aayog in ram puma dawmkan ngai Aspirational District 112 leh Aspirational Block a thlang chhuak a ti a, Mizoramah District leh Block hnufual bik dawmkan ngai tehfung hrang hrang a teh a, thlanchhuah zingah Mamit chu Aspirational District-ah thlan niin; Aspirational Block-ah Mamit District atangin Reiek Block, Saitual District atangin Ngopa leh Lunglei District atang Lungsen Block te chu thlan an ni a. Lungsen Block chu nasa leh zuala Department hrang hrang ten tan an lak ngaihna bik a ni tih a sawi.

DC chuan Aspirational Block tan hriselna, eitur tha, zirna leh kuthnathawha eizawna bakah khawtlang nun hmasawna lam hawia kalpui tur a ni tiin Line Department hrang hrang chu lungrual taka an thawhho a ngaih thu a sawi a, hmalakna hrang hrangah thapui thawha beihpui thlak a ngaih thu a sawi bawk.

He hun-ah hian Line Department panga ICDS, MzSRLM, Health & Family Welfare, Agriculture leh School Education atangin report ngaihthlak niin; an hmalakna leh hmachhawp bakah harsatna thenkhat inkalpawhna leh internet that tawklo na te an sawi bawk.



GALLANTRY AWARD

President Draupadi Murmu chuan nizan khan sipai leh police huaisen chawimawina Gallantry Award mi 36 hnenah a hlan

New Delhia Rashtrapati Bhavan-a Defence Investiture Ceremony (Phase-I) ah he award hi hlan a ni a. Award hlan te hi Kirti Chakras 10 leh Shaurya Chakras 26 te an ni a.

He hunah hian Vice President Jagdeep Dhankhar, Prime Minister Narendra Modi, Defence Minister Rajnath Singh, leh Lok Sabha Leader of Opposition Rahul Gandhi te an tel leh mi pawimawh engemawzat an tel a ni.



NEET-PG

NEET-PG Entrance Examination 2024 chu tun thla ni 11 ah buatsaih a ni dawn a. Tun tumah hian shift hnihin an exam dawn a. National Board of Examinations in Medical Scieces chuan nimin khan exam hun hi a puang a. Exam hun atana ruahman thla hmasaa neih tur chu sawnin tun thla ni 11 sawn a ni a. Tunhnaiah exam hrang hrangah thil diklo awm nia sawi vangin exam hun hi sawn a ni.



UK ELECTION

Labour Party hruaitu Keir Starmer chu UK Prime Minister thar a ni dawn. UK inthlanpui neih zawh takah Labour Party ten seat 650 ah 412 an la a. Pu Starmer hi King Charles-a chuan Buckingham Palace ah sawrkar thar siam turin a sawm a ni.

Labour Party te hian kum 10 chung opposition an nih hnuah sawrkar an siam dawn a. Inthlana hnehna an chan hnu lawkah kum 61-a upa Starmer chuan mipuiin inthlak danglam duhin an thlang tling a,hei hi a takin a thleng chho mek a ni.

British Prime Minister Rishi Sunak chuan an chaklohnaah a mawhphurhna anih thu sawiin British mipuiten thutlukna felfai tak an siam tih sawiin zirtur tam tak an nei a ni a ti.

